

吉水縣志卷之二十四

吉水縣知縣長沙周樹槐纂



列女志

秋水如鏡秋月如冰烈哉女德鏡破冰凝霜燈夜月  
茹荼飲蘖黃泉同歸白璧完節烹鮮佐養晝荻稱賢  
芳流彤管寵錫鸞箋志列女

節孝 賢母 命婦附

宋

歐陽夫人鄭氏吉水崇國公觀之妻文忠公修之母

也年二十九守節畫荻教子慈母嚴師致文忠以文章忠節名天下累封越國魏國大夫人壽七十二事在瀧岡阡表

楊夫人羅氏吉水東山長孺母誠齋萬里之妻也年七十餘每寒月黎明卽起詣厨躬作粥一釜遍享奴婢然後使之服役其子長孺啟之曰天寒何自苦如此夫人曰奴婢亦人子也清晨寒冷須使其腹中畧有火氣乃堪服役耳長孺守吳嘗積月俸以爲夫人壽夫人偶嬰微疾尋愈忽出前俸曰自

吾有此意恒不樂乃致疾其悉以謝醫當無事嘗  
於郡圃種苧躬紡織以爲衣時年八十餘矣平居  
不事華飾生四子三女悉自乳曰饑人之子以哺  
吾子誠何心哉

文夫人歐陽氏吉水丞相天祥妻遭流離顛沛中絕  
無愠尤自空坑之敗夫人與子佛生等皆爲俘鹵  
一路求死不得入都時服道冠衣敝衣日誦道經  
比丞相致命之明日夫人得旨收屍有江南十義  
士奉丞相柩塋於都城小南門外後歸故里以元

大德九年乙巳二月卒夫人有小姑適龍泉孫臬  
臬叅謀丞相幕小姑悉出簪珥以供軍需未幾臬  
被執家没入官小姑奉臬生母攜子蕭翁約翁及一  
女赴燕零丁孤苦能持禮守義不失其操丞相集杜  
詩有云近聞韋氏妹零落依草木深負鵲鴿詩臨  
風欲慟哭蓋傷之也

元

熊以德吉水人妻李氏夫亡氏年二十四至正壬辰  
兵亂負子避難文水之西亂定改築室於學宮之

南教子撫孤年九十而終

學諭鍾仁卿妻危氏仁卿卒四川內江學署氏守節  
撫孤壽一百三歲奉詔旌表學士曾德裕銘其墓  
李允臧妻鄮氏巽亨女進士同仁祖母允臧以運糧  
溺安慶江中氏年二十一撫孤督學奉舅姑生事  
死塋俱如禮年八十一卒

明

楊存海妻曾氏夫亡守節撫從子福爲後福亡撫孫  
謙德終始相保洪武十八年旌

曾氏三節曾明輝妻子居中妻孫仲持妻三世皆娶  
周氏明輝妻周方大女二十八守節居中妻元東  
宮說書周志遠女二十七守節仲持妻周子敬女  
編修孟簡女弟夫亡年二十三皆持節自誓堂額  
世節梁潛記

羅氏三節羅韞匱妻歐陽氏韞匱卒氏年二十五撫  
孤守節篤溫娶歐陽氏生子一歲歿次篤良娶袁  
氏生子五歲歿二婦共矢志養姑育子溫妻年九  
十卒良妻年五十卒鄉里稱三節婦

楊鼎元妻李氏夫死氏年二十子恭生八月鞠育有成事舅姑孝養洪武二十年旌

李邦振妻周氏振以兄邦武坐累就逮從兄至京兄病卒振亦哀毀死氏年二十二姑老子幼矢節持家子沂浴作貞節堂奉母學士周敘記

蕭氏雙節蕭東鑑妻劉氏及繼嗣徵濟妻劉氏鑑娶劉端習女鑑卒子瑀半歲夭撫姪徵濟爲嗣娶劉氏生子存性徵濟卒姑婦相誓守鄉大夫表其堂曰雙節

解氏五節解瑛妻劉氏副使劉鼎貫女年二十二而寡卒年五十四瑛同母弟璫娶徐氏亦早寡守節五十餘年其娣周氏年二十餘夫珙卒從二妯以守又瑛從兄弟璇妻李氏玉妻曾氏俱年二十餘孀居並七十六終時人語曰解氏五節松貞玉潔饒伯振妻劉氏永豐人編修劉鶚女夫亡守節永樂間旌

王氏雙節王建山妻許氏年二十九而寡撫一子著炯比長娶戴氏炯復疾卒戴年二十七撫二孤甘



貧砥節王安器爲之傳

李秀妻周氏年二十六夫亡撫遺孤安貧事姑盡孝以孫邦華貴累贈一品夫人

李士開妻歐陽氏妾宋氏士開早卒宋有子在襁褓歐陽撫之相倚守節教子力學御史上其事建雙節坊

王五爵妻周氏爵卒氏矢志居帶溪涉者艱於行氏爲橋濟之功垂就卒夫弟五玉嗣成之榜其名曰嫠婦橋

王堯儒妻丁氏新淦人隨父在河南堯儒就婚丁年十九堯儒疾卒遺腹生一女未幾父亦卒氏隨兄扶父與夫二喪歸吉水家貧苦節年七十二終

羅季翊妻周氏年二十守志勤勞紡績延師訓子年七十七終

編修鄧珍妻蕭氏年十七歸珍數月珍以會試登第官編修卒櫬歸氏守志事舅姑以孝聞年八十八終天順間旌

解逢春妻劉氏逢春卒氏年二十三矢節植孤勤勞

紡績六十五年及卒貧不能塋邑令黃愷哀捐俸  
六緡舉事里人鄒元標題其墓

諸生羅大紀妻李氏大紀遊學信豐卒氏年廿二甘  
貧守節以第三子出養郡城劉氏後知劉故人奴  
氏攜長子告於族行人大紘捐贖歸爲作出兒記  
周伯循妻曾氏夫亡年二十隣婦勸改適氏婉拒之  
守志三十年成化間旌

王象翹妻羅氏年二十七而寡撫子三十年督學蔡  
克廉廉其節遣有司以禮揚之

高登吾妻朱氏年二十三生子三日登吾歿踰年姑復卒族人數侵毀之氏不與較孤長家難始紓諸孫入庠序

劉仲機妻袁氏夫亡氏年十八守節六十載宏治十八年旌

羅洪一妻李氏無子早寡以紡績自養年七十餘卒曾煥母失其姓氏夫卒矢死守節教子成名

胡文煥妻解氏年二十一夫亡事姑撫子守節三十年年五十卒

黃子仲妻周氏庶子述曾孫女年十九生子協華六  
越月子仲天家極貧氏絀績撫孤有成嘉靖戊午  
督學王宗沐遣使存問年六十餘卒

陳洪妻劉氏年十九歸洪居三月洪出商以病歸卒  
生子甫數日遂茹素終身年七十羅洪先爲之傳  
李滇妻羅氏夫亡甘貧守節嘉靖間羅洪先爲之狀  
朱寅奮妻劉氏夫亡年二十四撫孤廷相廷植年六  
十餘卒天啟二年旌

彭懋妻張氏年二十七夫亡孤天矢節孝事翁姑卒

年七十餘夫兄叅政桓爲建表節橋布政杰記

黃良寵妻羅氏年十八而寡矢志守節年七十卒天

啟間旌

李貴爵妻張氏年二十六夫客楚歿氏撫孤有成年

七十卒

婁永齡妻藍氏年十八適婁一月而寡立嗣爲後事

二姑盡孝崇禎間旌

藍教妻羅氏年二十八守節撫二孤九十餘歲卒

郭仲稷妻聶氏生子越三月夫故氏年二十嚙指血

誓事翁姑撫遺孤詔旌其門

給事羅大紘繼妻楊氏年二十九紘歿剪髮毀容持齋矢志以夫貴封宜人

婁伯麟妻王氏年十八而孀守志孝事翁姑撫孤成立知府徐映薇題曰冰清玉礪

劉叔鉞妻李氏劉娶數年叔越卒遺腹生子多病氏憂瘁成疾亦歿其翁爲作節義傳

陳節婦黃氏陳文繼妻也初授陳聘而文繼癘媒者言欲得黃氏視病請權宜歸於陳其父母諾之氏

至見陳室中蕪穢衣被盡沾乃躬爲糞除澣濯與共臥起踰月陳竟不起黃氏執喪盡哀以塋父母迎之不歸數年翁姑相繼歿家落而守益堅年五十羅叅政言之直指使請表其閭

董節婦袁氏董朝紳妻早寡守節以紡績養姑正德辛未流寇突至婦與姑同被執賊欲辱之婦姑相持哭聲振地賊遂相戒勿犯釋之歸

周必登妻王氏歸周年十九姑病風侍奉不厭穢惡夫卒不食者數日扃戶紡績比老歸吊其母一日



忽語弟曰我死屍還周氏頃之無疾卒弟如言還屍於周里人慟之

周梧鳳妻宋氏周翔鳳妻藍氏俱明萬厯以前旌表  
胡稽範妻張氏易若僖妻劉氏鄧仲珍妻劉氏俱明  
正德以前旌表

彭堙妻羅氏早年夫亡無子甘貧守節年七十卒  
諸生彭元鏞妻陳氏年十九守節完操卒

附明賢母

解夫人高氏學士大紳母幼慧淑精女工通書史父